

至誠感故求生者腹中而起一形之中別知天地之體也而包八十一域合四海五嶽雲與雨施在於吹噓溼潤液在於呼吸形在神往忽若指掌坐修於宵心之裏然臻福八極之表神和霧集在於不移清淨一時之間消災致壽長生在已也故曰不窺牖見天道不出戶知天下

太上洞玄靈寶法燭經終

太上靈寶智慧觀身經

靜觀真人於思微中觀身實相深達智慧了見四大六種根識及五聚蔭五印世法皆悉空寂入無相門所謂外想內想若生想若滅想了了照盡無淨穢法無生滅法如是盡處亦無所盡究皆是空空竟升玄何以故內想者名境觀空是空亦空空亦空空無二致故言空故是無分別空亦復皆空空無二致故言其盡若善男女照法空性無起滅心無憍慢心無恐怖心無憎愛心能於世間免種種苦所謂生死別苦鬼神害苦官私口舌苦水火刀兵饑寒苦皆悉免離如是盡利益非於一人二人必於無量無邊無量數人非一天二天無量無邊無量數天其功德力不可思議是故此說名為解脫名利益義名無量義名第一義如是諸義若書若寫若讀若誦若解說是為入智慧門遊智慧室坐智慧牀餐智慧食得智慧真相之體即於爾時說智慧頌曰  
智慧起本無 朗朗照十方 結空峙玄霄

諸天把流芳 其妙難思議 虛感真實通  
有有有非有 無無無不無  
智慧常觀身 學道之所先 渺渺入玄津  
自然錄我神 天尊常擁護 魔王衛寶言  
見見金剛軀 超超太上仙  
智慧生戒根 真道戒為主 三寶由是興  
高仙所崇受 況此不死丹 倏忽濟大有  
當此說戒時 諸天來稽首

太上靈寶智慧觀身經終